

四庫全書

史部

欽定四庫全書

西湖遊覽志卷十七

明 田汝成 撰

南山分脈城內勝蹟

道院

宗陽宮龍翔宮靈順宮佑聖觀景隆觀玄同觀紫瓊觀  
宗陽宮本宋德壽宮後圃也去吳山東北五百步新  
宮橋之東三聖廟橋之左先是紹興間望氣者言其

北有鬱葱之祥遂建德壽宮高宗禪位後居之咸淳  
四年以後圃築道宮曰宗陽祀感生帝每遇孟享車  
駕嘗臨幸焉有無極順福毓瑞申佑景緯等殿玉籙  
藥簡等樓大範觀化觀妙等堂會真澄妙常淨等齋  
丹丘玄圃等亭皆揭以奎藻闢圃鑿池花卉森茂元  
初燬延祐間真人杜道堅重建築老君臺肖老聃像  
于中旁列尹喜辛銍庚桑楚南榮越尹文子士成琦  
崔瞿柏矩列禦寇莊周趙子昂為之記元季燬洪武

間葉月庵永樂丙申周道淵宣德癸丑沈復珪弘治  
元年沈復純相繼重修內有老君臺得月樓 杜道  
堅號南谷當塗人風度清雅嘗以中秋集儒彥登老  
君臺玩月分韻賦詩楊仲弘為絕唱其詩云老君臺  
上涼如水卧看冰輪轉二更大地山河微有影九天  
風露寂無聲龍蛇並起承金榜鸞鳳雙飛載玉笙不  
信弱流三萬里此身今夕到蓬瀛

龍翔宮在清湖橋西先是理宗既即位詔以沂邸為



龍翔宮以祀感生帝宮在後市街其傍別作南真館以棲道流錫田千頃元至元間嘉木揚喇勒智較輟道流改宮為壽寧寺住持胡元洪力爭于朝僅得田土一半而宇不可復得矣乃改建今所即故宋楊和王宅第後奉神祠也齋居有十曰履和順正全真宜休觀妙東明環隱中和守正安晚中門曰昭符鐘樓曰和應藏殿曰琅函寶藏規制宏麗視舊益加元統間燬住持史景仁重建楊維禎葉廣居為之記方丈

後疊石鑿池蒔藝卉木婆娑翦鬱象海中仙島號小  
蓬山陳旅為之記元末張士誠占為軍器局國初住  
持毛繼祖請於朝復之今為叢林內有魚樂軒 楊  
維禎碑銘云二馬渡江一馬瀧東觀邸闢森開張穆  
將祀予感生皇疾以燁怒靈威昂十一景緯生寒芒  
天人南下南斗傍朝與龍飛暮龍翔翠蓬三度黃塵  
揚靈宮突立天中央湖眉海眼東西望地柱不傾天  
乳長黃鬚仙伯古冠裳龍腦寶箴聲琅琅上清淨掃

赤尾翔六龍在天天下昌山君海孤紛來王南極上  
壽日重光 桂衡魚樂軒詩疎簾清簟卷瀟湘讀到  
南華第幾章活水遶門春潏潏游鱗吹浪暖洋洋朱  
紅欄檻通方沼紺碧桃花出矮牆遲日沙波牽細荇  
微風磐石掃垂楊屢分早飯烏麻熟曾醉春醪白朮  
香異日鯢鯨終變化當年雞犬亦騰驤天寒翡翠毛  
衣薄月出珊瑚樹影長莊子濠間從看去琴高海上  
許騎將梅邊洲渚渾青淺雁後蕪葭愈老蒼一曲棹

歌聲歛乃三生漁父夢滄浪積來皓雪深為洞留住  
朝雲巧作房王母蟠桃依舊好麻姑麟脯至今藏時  
迎賀客皆英彥日課詩書敢怠荒別有功名期令子  
卧冰無用學王祥

靈順宮在板兒巷旱河頭舊名寶山院宋嘉泰間建  
丞相鄭清之修皇明正統間真人張澹然扁名靈順  
佑聖觀在興禮坊內宋孝宗潛邸也光宗寧宗皆誕  
于此淳熙三年改為老氏之宮以奉北極佑聖真君

時趙粹中為吏部侍郎夢有客謁之著羽衣長七尺  
視其刺曰北方鎮天真武靈應真君粹中奉神素謹  
趨下迎揖不敢執王禮神固請粹中東向坐曰侍郎  
今日之事子為政矣粹中局蹐而寤明日得旨為奉  
安聖像使紹定間賜額曰佑聖宮命學士院書之篆  
書佑字傍無人字道流歟然曰宮無人何以自立事  
聞上特許加人字孝宗嘗題杜甫詩于壁云富貴必  
從勤苦得男兒須讀五車書理宗又書全篇于東宮

廳之屏元大德七年燬踰年重建改為佑聖觀基甚  
宏敞今錢唐學舍皆其地也元季兵火此觀獨存皇  
明洪武十五年置道紀司于觀中元時有道士王景  
周者開東閣以居即今錢唐公館是也蘇伯衡為之  
記畧云王景周居佑聖觀之西廡居之東有地二畝  
而羸剪荒剔翳以為圃脩竹數百竿夷其中可列坐  
風月之夕或觴或奕無適不宜曰洗竹亭亭之右隱  
阜絙起有樹鬱然則七葉木也曰七葉坡由坡而西

有屋兩楹中皮髹几琅函森列曰禮經筵筵后重屋  
朱甍碧瓦翔于物表白雲依簷君思親之不可見則  
泣然出涕曰夢雲樓樓之下簷之外深榭翬飛護以  
欄楯傍植葡萄蔓延其上彌布四阿清風自生日影  
不下曰清暑簷簷之外黃精蒼耳白朮紅藥椒蘭芎  
芷杞菊之屬雜然並蒔秩若布卦曰種藥畦中畦築  
圜基而墁以甃一鶴棲息其上甚馴曰馭鶴臺臺側  
鉅石虎蹲可踞而吹笙曰吹笙石石側冬青十餘株

離立若相峙而高皆數丈蒼翠掩映下甃小逕曰冬  
青逕逕南出直小園有井焉甘冽異常得開元宮浴  
鵠池八稜石欄置其上曰天一泉就而洗藥郁烈四  
達好事者比之神漢曰洗藥井 石欄上刻虞伯生  
天一泉銘蓋開元宮故物也銘云大荒南陲元氣積  
陰闕闔扉陽洞闢曲穴流泉保靈宅任君來餌黃赤  
石天一名錫天元冊曲阿受養良有擇構宮方嚴自  
王伯清蹕臨止靈響格虛林森爽化赫奕福鄉帝子



發甘液不食何年喪遺甕白雲映空玉清客開元全  
盛煩百役持節旁午文繡辟爾來蕭條世代隔石磴  
刻文未漫畫誰其啓之規古昔句曲外史美冠烏研  
書千卷視貞白天真景隨玄系繹金室玉堂萬無數  
景隆觀在保民坊板兒巷宋嘉定十四年詔以舊修  
內司改建名通玄庵在新門外寧宗書景命萬年閣  
元末築城移入城內尋燬于兵成化八年史志中重  
建

玄同觀在癸辛街元至元間都道錄郎如山建大德間賜額尋燬皇明宣德二年道士殷大宗重建內有瞰碧園清麗可賞

紫瓊觀在鹽橋南荷池上元延佑間真人吳全節建長春庵凝真庵純陽庵玉陽庵奉真院玄真院洞玄院崇善院顯真院洞真院真濟院上真院白馬廟華光廟五顯廟廣福祖廟舊城隍廟

長春庵在相安巷元延祐間有姚真人者錢唐人家

業溫飽其妻蔡氏一旦語其夫云欲脫俗修真以家  
業二分畀夫取妾為成家之計自以其一建庵為修  
養之需夫曰汝既修真吾無子女何忍獨墮俗緣耶  
蔡氏然之乃曰修真不宜夫婦同處與夫各建一庵  
于西城下夫庵在妙心寺北曰長生妻庵在洪福橋  
西曰長春夫妻皆證道妙時謂之雙修云蔡氏號沖  
靜弘治十一年賜真武像玉樞經于庵內楊廉夫詩  
云夜坐清都鶴夢長碧天如水月蒼蒼雲和有藥降

王母霹靂無車喚阿香雪泛玉甌茶吐味花零金剪  
燭生光僊風不動庭前竹又送微鐘到下方趙子昂  
詩云流水橋西一徑斜青衣相接到仙家香分橄欖  
燒銀葉酒瀉松脂溢紫霞綠竹滿堦初解籜碧桃幾  
樹正開花何時脫却塵凡累來叩丹房九轉砂聶大  
年詩云藥宮琪樹罷棲鸞空有玄都太古壇野老不  
尋餐玉訣山人自製切雲冠杖龍化去秋池涸笙鶴  
歸來夜月寒前度劉郎偏好事種桃留與後人看

凝真庵在忠清里內元至元庚子杭州大疫里人馬  
均禮延紫陽庵道士姚懶朴作法治之境內以安里  
人共購地結庵以奉懶朴洪武十八年徐道真等正  
統二年蕭自然等成化十年屠宗善等相繼重修  
純陽庵在忠清里小巷元至正間建特進神仙重玄  
子書弘治三年道士姚德恂重修

玉陽庵在馬市巷

奉真院在下馬坡巷洪武十六年道士李道椿建有

巢聖樓景泰初燬重建

玄真院在雙茶坊巷內元至正間建尋燬洪武二十九年重建有來翠樓方井丈餘雖旱不竭

洞玄院在惠民坊北元延祐間建

崇善院在淳祐橋側元延祐間建

顯真院在慶春門內

洞真院在褚家塘宋紹興間建

真濟院在梅東橋東宋紹興二年建

上真院在裝駕橋西南宋建炎三年郡人錢隆捨宅  
建

白馬廟在七寶山之東麓宋建炎間以祀磁州崔府  
君者詳見顯應觀

華光廟在普濟橋上本名寶山院宋嘉泰間建紹興  
初丞相鄭清之重修以奉五顯之神亦曰五通五聖  
江以南無不奉之而杭州尤盛莫詳本始搜神記所  
載妄誕不經而宋朝會要亦不詳載姓氏或曰五顯

五行之佐也而五通非五顯也宋政和元年詔毀五通淫祠則五通非五顯明矣豐樂橋上亦有華光廟五顯廟在里仁坊內元元統二年建元末燬國初王瑞雲重建正統中吳玄理趙道純復拓大之又燬郭廷輔重修五顯者五行之佐也無姓氏可考宋時賜號一曰顯聰昭聖孚仁福善王二曰顯明昭聖孚義福順王三曰顯正昭聖孚智福應王四曰顯直昭聖孚愛福惠王五曰顯德昭聖孚信福慶王五王封號



皆有顯字故謂之五顯廟云

廣福祖廟在鹽橋東南即蔣七郎家祠也每歲六月九日郡人以神誕日奉香火

舊城隍廟在羊市宋紹興元年建以祈蠶穀國朝水樂末年憲使周公以直道被法後為杭州城隍神數見盱嚮杭民因奉其主為新城隍而改奉舊主於此為舊城隍廟

西湖遊覽志卷十七

欽定四庫全書

西湖遊覽志卷十八

明 田汝成 撰

南山分脈城內勝蹟

佛刹

演教寺水陸寺祇園寺東岡寺姚園寺慈雲寺金剛廣  
福寺大慈庵靈芝寺長明寺惠林寺普慈寺悟空寺相  
國寺華藏寺佛慧寺仙林慈恩普濟寺七寶寺潮鳴寺

法雲寺崇恩延福院妙慧院廣壽慧雲寺普照院長生  
寺法明寺白蓮寺寶梵寺慧安寺西井寺靈壽寺覺苑  
寺真教寺

演教寺在吳山東北半里許紹興間僧慧海建于新  
門外張氏展城圍入宣德間達禪師正統間僧得奉  
道靜相繼重修兵部侍郎苗衷為之記衷錢唐人洪  
武初徙居鳳陽世居寺南去里許兒時讀書聞寺鐘  
聲即起篝燈矣

水陸寺在獅子巷宋太平興國七年生法師建成淳  
間僧師則重修內有銀杏樹二株甚巨蓋宋物也寺  
故在城外張氏展城圍入

祇園寺在獅子巷西北太平興國間僧清照建舊在  
郊臺側南渡後造御馬院移築于此

東岡寺在獅子巷西宋乾德元年德法師建紹興三  
十二年賜額永樂十八年僧松巖重建

姚園寺在高陽閭巷宋初為姚氏花園紹興初僧慈

昌購園結庵乾道初賜額姚園寺淳祐二年建膺福殿以奉理宗御容洪武初僧大雲重建

慈雲寺在高陽閭巷周顯德二年僧圓覺建名慈濟宋大中祥符改曰慈雲理宗書靈感道場洪武二十四年立為叢林沙門延禮重修嘉靖二十年燬僧圓鼎重建

金剛廣福寺在板兒巷唐天成間僧善果建乾祐二年燬至元十二年重建

大慈庵在墓園巷宋淳祐四年僧德殊建洪武三十四年僧可觀重修

靈芝寺在東花園崇新巷俗稱蠟燭庵唐貞觀間郡人施光慶捨宅建名實際院元季燬元統間僧妙通重建永樂宣德正統間僧能守如真智淳皆以纂修釋典徵入錢唐縣歲造土牛迎春于此元時劉伯溫以行省都事坐法宿庵中簡俊上人詩云城外春江動客愁江邊細草綠悠悠還將短髮臨歧路畏向東

風憶舊游斜日遠天歸雁急薄雲孤館落花稠青燈  
不放還家夢一夜腸回一萬周

長明寺在螺螄門內晉天福間建宋開寶四年錢王  
改名法燈治平二年改長明佛印禪師開講于此元  
季燬弘治十五年僧如埧重建

惠林寺在蒲場巷紹興初汴僧惠林禪師隨駕來杭  
建相國院于天慶坊嘉定四年移于薦橋門外報國  
寺基改名惠林元至正間展城圍入尋燬洪武初僧

曇芳重建

普慈寺在蒲場巷內宋紹興間僧思淨建元至元間僧元忠修

悟空寺在淳祐橋東晉天福七年僧齊教建名崇新院大中祥符改額淳祐六年法昌重修元末燬永樂元年德無重建

相國寺在淳祐橋東北百步許北齊天保六年建名建國唐時燬為鄭景宅園景雲初僧慧購為寺值睿



宗由相王即位賜名相國元末燬洪武初僧大雲重建置僧綱司于內正德八年僧東明重修

華藏寺在橫河橋東唐清泰二年吳越王建名報恩院大中祥符間改今額

佛慧寺在肅義巷元大德間壽法師建洪武二十四年立為叢林正統十四年林景山重修

仙林寺在安國坊宋紹興三十二年建隆興元年孝宗賜額曰隆興萬善戒壇淳祐三年理宗賜額曰飛

天法輪寶藏又置鐘銘賜之銘曰大塊噉噓震薄蓋  
輿眷此洪鐘以實出虛樂銑其角十分其鼓豈有鑄  
鼎收金遺禹博大闡繹厚薄和均上開天閭下徹地  
垠乃警聾聵乃割昏曉咨爾有聞孰不心皎以為有  
聲匪撞不鳴以為無聲如雷如霆作鎮梵宮法音無  
際鞏我神臬萬有千禩元至正間張士誠據為軍器  
局洪武四年重建置僧綱司有司即其鐘樓為郡城  
昏昕之節正德間徙其鐘更鑄置朝天門仁和縣歲

造土牛迎春于此

七寶寺在鹽橋北梁貞明七年錢王建名上方多福  
院宋大中祥符間改額有六游堂臨輝閣郡守王欽  
若詩

潮鳴寺在慶春門北舊在門外梁貞明元年建初名  
歸德院高宗南渡駐蹕寺中聞江濤聲以為金兵追  
至也駭之已而問知其故遂賜今名寺北有回龍橋  
高宗嘗作詩賜統制劉漢臣勒石寺中其詩云野水

參差落漲痕疎林欹倒出霜根扁舟一棹向何處家在江南黃葉村  
洪武二十四年立為叢林

法雲寺晉天福五年吳越王為詔禪師建至正丙申燬  
洪武九年雙林寺愚禪師重建

崇恩延福院在鹽橋下八界

妙慧院在褚家塘開道元年錢氏建南渡後以其地為御園  
元至正間復建今併佛惠寺

廣壽慧雲寺在白洋池畔宋淳熙十四年張循王之

孫鎡捨宅建寺紹熙元年賜額俗稱張家寺有留雲  
亭白蓮池元至正間燬洪武十七年僧文副重建永  
樂九年永忠宣德間廣睿弘治元年福海相繼重建  
僧梵琦留雲亭詩云人家十萬繡成堆未抵南朝  
一段奇象輦不來春草綠小亭雲鎖紫珉碑 僧德  
祥白蓮池詩云念念西池道路賒東池今已種蓮花  
他時若到西池上應念東池是故家

普照院俗稱報師庵在鹽橋北晉天福八年建洪武

十四年僧正宗重修嘉靖八年燬重建

長生寺在艮山門顯德四年吳越王建南渡後改為  
九宮壇齋宮元至元間重建

法明寺在艮山門內宋建炎初建以寓流僧今併潮  
鳴寺

白蓮寺在仙林橋東晉開運元年吳越王建名華藏  
院宋治平間改妙惠院咸淳間僧祖顯誦經持戒地  
產白蓮因賜白蓮妙惠寺額

寶梵寺在沙皮巷晉天福初建崇新門外名崇壽院  
宋淳熙二年徙建今所崇寧元年賜額寶梵洪武二  
十四年併入慈雲永樂元年重歸原所尚書夏原吉  
為之記

慧安寺在十三灣巷晉天福間吳越王為明律師建  
于草橋門外羅木營地元季燬洪武初僧得實移于  
錢唐保安坊東永樂乙未又移今所少保兵部尚書  
于謙為之記

西井寺在井亭橋西詳見鄴侯祠

靈壽寺在曲阜橋東元至正二十一年江浙行省左丞相達實特穆爾建本輝和爾世族故稱輝和寺俗訛為義烏寺洪武二十四年改今額

覺苑寺在豐樂橋東詳見三忠祠

真教寺在文錦坊南元延祐間回回大師阿里鼎所建先是宋室徙蹕西域夷人安插中原者多從駕而南元時內附者又往往編管江浙閩廣之間而杭州



尤夥號色目種隆準深眸不啖豕肉婚姻喪葬不與  
中國相通誦經持齋歸于清淨推其酋長統之號曰  
滿拉經皆番書面壁膜拜不立佛像第以法號祝贊  
神祇而已寺基高五六尺局鐫森固罕得闌入者俗  
稱禮拜寺

西湖遊覽志卷十八

欽定四庫全書

西湖遊覽志卷十九

明 田汝成 撰

南山分脈城外勝蹟

衢巷河橋

出正陽門為慶豐橋柳翠巷海鮮巷南新橋尊勝巷梁  
家橋顏樓巷諸橋馬倉巷槐花巷美政橋洋洋橋海月  
橋化仙橋進龍橋

慶豐橋之水入城為六部橋其上流為岸橋南新橋沿城而西為萬松嶺下嶺為松林街其東為車子巷柳翠巷內有柳翠橋相傳宋時妓女柳翠所建

海鮮巷內有海鮮橋石長丈餘其文如魚龍菹藻之狀巧如繪畫蓋宋時故內物也

尊勝巷內有尊勝寺

梁家橋進九曲巷出青果團

諸橋街通上輓路

馬倉巷之北宋有嘉會門

槐花巷之東為白壁營

美政橋宋有玉津園

洋洋橋有龍王廟萬厯中建海月橋于橋南

進龍橋近進龍浦

出候潮門為嘉會橋濟川橋上輓路期清巷蕭公橋太  
平坊信義坊利津橋牛皮街跨浦橋渾水閘鯊團巷鐵  
箭巷鐵幢浦

嘉會橋通貼沙河之水入城貼沙河一名裏沙河舟筏所經北抵艮山門者

濟川橋在抽分廠前初名櫟木橋相傳錢氏偏據時旁堆櫟木俗因呼之又謂普濟橋或曰因舊有普濟寺得名正德六年主事王光佐重建改今名

上輓路宋時園丘大路御輦所由也

期清巷有馮公廟

太平坊宋有便門

信義坊俗名筍團巷其傍有連公池

利津橋北為鐵幢

牛皮街上有龍舌嘴

跨浦橋街一名衆義巷

渾水閘下有善利院夫差廟

鐵箭巷相傳為錢王射潮之所劉伯溫錢王箭頭歌  
鴟夷遺魄杓餘怒欲取吳山入江去雷霆劈地水羣  
飛海門扶胥沒氛霧英雄一怒天可回肯使赤子隨

鮫鮓指揮五丁發神弩鬼物辟易腥風開三百年來  
人事改濤落沙平箭空在石梁飲羽未足誇蜀國三  
犀謾欺鮓近聞黃河水亂流青徐一半悲魚頭安得  
壯士幹地軸為拯斯民塗炭憂

鐵幢浦相傳吳越王鏐築塘以捍江水置鐵幢三以  
為水則幢製如杵徑七八寸出土可三尺餘其趾入  
土不知若干初置幢時塘猶未成慮潮蕩幢用鐵輪  
護其趾而以鐵綆貫幢榦且引綆維于上下之槌然

後實土築塘故幢首出土耳宋淳祐間安撫趙與憲  
作亭覆幢今亭夷為民居獨存湮池而鐵幢之首斲  
出可驗一在舊便門東南小巷一在舊薦橋門外皆  
湮塞無考獨在利津橋者僅存而又為民居所占若  
不表識久亦湮矣

出永昌門為保安巷新安巷真如巷大通橋映江樓  
保安巷通永昌壩

真如巷內有真如寺



大通橋傍有銀杏樹為艤舟渡江之所今沙漲去岸者二十里矣

映江樓宋時有亭扁曰煙雲魚鳥元至元丁丑燬至正庚寅重建扁曰瞰江正德元年太監麥秀御史車梁布政使林符等改建層樓扁曰映江吏部尚書屠浦為記樓側為宋臨安府城南廂廳有左右軍巡使判官掌風火盜賊推鞠及檢覆抄劄打量定驗之事凡事之小者皆得專決焉蓋古督郵司隸之職也故

俗稱兵馬司

官署

工部分司浙江驛浙江亭城南稅課司

工部分司在候潮門外先是漕船木料及京師壇殿倉庫器皿等每歲坐派軍民出辦成化七年千戶汪禮奏乞于杭州荊州太平等府設關抽分商木應用以免軍民之擾朝議從之始有抽分之令歲差工部主事主之二十二年差御史弘治五年差太監相兼

取辦正德十六年專委工部至今仍之凡商販竹木  
十取其一初時解銀四千兩遞歲增之乃至一萬四  
千餘兩

浙江驛在龍山閘洪武三年建

浙江亭古之樟亭也白樂天樟亭驛見楊舊詩往恨  
令愁應不殊題詩梁下又踟躕羨君獨夢見兄弟我  
到天明睡亦無又宿樟亭驛詩半夜樟亭驛愁人起  
望鄉月明何處見潮水白茫茫鄭谷題樟亭驛樓詩

故國江山外登臨返照間潮來無別浦木落見他山  
沙鳥晴飛遠漁人夜唱閒歲窮歸未得心逐片帆還  
孟浩然與錢唐令登樟亭驛詩百里鳴雷震聞絃暫  
輟彈府中聯騎出江上待潮觀照日秋空迴浮天渤  
澥寬驚濤來似雪一座凜生寒

城南稅課司在浙江亭邊吳元年設于顏樓洪武五  
年改建于此

### 祠廟

昭貺廟順濟廟順濟聖妃廟協順廟

昭貺廟在渾水閘其神張夏字伯起宋景佑間以司  
封郎中為兩浙漕使江湖為患故隄率用薪土常被  
衝擊每繕修不三歲輒壞重困民力神始作石隄上  
自六和塔下自東青門延袤十二里人感其功為立  
祠隄上賜額昭貺土人稱張司封廟慶厯二年贈太  
常少卿大觀二年八月封寧江侯改封安濟公紹興  
十四年增靈感字三十年增順濟字每潮水啗岍禱

之輒應成化間江潮泛溢命工部侍郎李顥督治禱  
神患息遂即舊址重建

順濟廟在清水閘其神馮俊字德明錢唐人天資剛  
直幼孤孝母年十八夢上帝遣神易其肺腑云將有  
微命既寤豁然開明初不習文藝至是書傳大義驟  
皆通曉叩以禍福莫不前知足未嘗履闕而人或見  
之江海上元祐中有舟渡江值大風分必死神即現  
形雲間自言名氏叱咤之頃顛濤帖息又嘗就寢竟

日乃醒家人視其嘔吐皆海錯異物怪而問之則云適宴于龍宮大觀三年十一月忽語人云上帝命司江濤事不得辭越三日不疾而終年三十有六先期旬日于清水閘所居西偏自營兆域既沒靈異尤夥人即所居祠之紹興三十年賜順濟廟額慶元庚申封靈佑公紹定間封英烈王

順濟聖妃廟在艮山門外其神林氏莆田人生而靈淑歿遂為神土人祀之白湖宋宣和五年賜廟額曰

順濟紹興間建廟于此封靈惠夫人紹興三年改封  
靈惠妃慶元四年加助順勅曰古以女神列祀典者  
若湘水之二妃北阪之陳寶西宮之女南少嶽之夫  
人以至丁婦勝姑莫不廟食夫生不出閨門而死乃  
祀食百世此其義烈有過人者矣朕惟望舒耀魄其  
名月妃川祇靜波其名江妃爾之封爵既曰妃矣增  
錫美號被之輪奐崇大褒顯以永厥祀

協順廟在石塚其神陸圭昭慶軍人宋熙寧間以祖



澤補右爵調真州兵馬都監宣和中引兵進攻方臘  
敗之死而為神紹興間海濤衝激江岸神檄陰兵却  
潮潮勢遂平淳祐間江潮衝激尤甚隨築隨圯神與  
三女揚旗空中浮石江面以顯其靈岸賴以成浙西  
帥臣徐栗以其事聞于朝賜廟額曰協順封神為廣  
陵侯三女為顯濟通濟永濟夫人一主護岸一主起  
水一主交澤傍有小廟祀十二潮神各主一時

道院

廣靈廟水府淨鑑院順濟宮

廣靈廟在石塘壩宋景定三年九月潮壞江塘里中  
耆老因立東嶽溫太尉廟請于朝賜廣靈為額咸淳  
五年封正祐侯餘自李將軍以下九神皆錫侯爵李  
孚佑錢靈佑劉顯佑楊順佑康安佑張廣佑岳協佑  
孟昭佑韋威佑

水府淨鑑院在嘉會門外桐木園乃馬自然修真之  
所龍德三年錢氏號水府院天聖四年改水府淨鑑

院乾道四年安撫周淙建扶桑大帝殿

順濟宮在清泰門外東里隅舊在湯鎮赭山之間曰  
三龍王廟宋紹熙元年賜雲濤觀額四年旱禱而雨  
改賜今額嘉定二年九月錫三神侯爵曰廣澤順澤  
敷澤嘉定九年增封曰廣澤靈應順澤昭應敷澤嘉  
應永樂間江潮擊之徙建今所天順七年拓地重葺  
成化七年江湧塘崩守臣禱神而濤殺再飭廟貌

佛刹

尊勝寺善應總持菴淨因寺浴池菴海鮮寺福田慶壽  
寺延聖寺普濟寺資教菴潮音菴圓通菴吉祥寺真如  
寺正定菴普陀菴永慶寺延壽白石寺崇福寺因果寺  
寶界寺定香寺月塘寺

尊勝寺在正陽門外尊勝巷故宋福寧殿也元嘉木  
楊喇勒智改殿為寺有尊聖塔俗稱白塔西有望江亭  
內有葫蘆井僧止菴過故宋宮井詩云上有千尺桐  
下有千尺井風吹井上桐零落井中影

善應總持菴在尊勝巷宋開寶六年錢王建于西湖  
南山曰總持治平二年改寶林院有可賦軒景定間  
遷建于便門鐵箭巷改善應總持院元至元三十一  
年復遷建令所張孝祥可賦軒詩光明獵獵上烏巾  
不那西湖爛漫春借我繩牀對脩竹為君一洗軟紅  
塵

淨因寺在正陽門外和肅坊元延祐己未僧斯受等  
建有銅佛三像銅塔一座元末燬洪武庚午僧法瀾

等重建弘治壬子僧宗謚等嘉靖癸卯僧鳴奉明濟等相繼重修

浴池菴在甘泉巷元延祐間里人施仲禮捨地僧斯受建鑿石為池構室臨之名曰觀堂嘉靖二十六年重修

海鮮寺在海鮮巷元至正元年建洪武三十三年重修

福田慶壽寺在候潮門外普濟橋宋寶祐二年徐路

鈴捨宅建請額曰福田以居白石皓禪師元至治間  
燬泰定間重修復請額加慶壽二字洪武二十四年  
立為叢林

延聖寺在候潮門外宋乾德間吳越王建于清波門  
外名土宿院天聖二年超法師沿江施食以濟修堤  
之士詔移院于今所賜額延聖嘉定年間御帶陳玉  
節於寺側建天妃殿崇奉海神元元統乙亥重建洪  
武二十四年立為叢林

普濟寺在候潮門外普濟橋宋太平興國元年建有  
理宗元命殿御書曰祈永度宗元命殿御書曰申祐  
皇太后元命殿御書曰順福有閣以奉觀音大士御  
書曰圓通寶閣石碑具存元初以祈永殿奉五顯之  
神元末燬國初重建

萬壽寺在江口門有江陽第一山扁

資教菴在候潮門外宋大中祥符元年僧堯道夫啟  
初庭建名火星菴宋末燬元大德間僧生禪師重建



請額曰火星資教院洪武二十四年歸併延聖寺

潮音菴在候潮門外元延佑間僧永暹建

圓通菴在候潮門外宋紹興間僧德厚建

吉祥寺在永昌門外宋紹興間建于皋亭山咸淳九

年移建今所洪武二十四年歸併福田寺

真如寺在永昌門外真如菴宋建炎三年僧普惠建

洪武十三年僧俊堂重修

正定菴在永昌門外陳鐵菴元至正間建

普陀菴在永昌門外浙江塘元至正間僧立宗建

永慶寺在清泰門外宋時楊節使香火寶慶二年建  
紹定三年燬景定四年重建元大德至正間曉大師  
重建

延壽白石寺在慶春門外宋建隆二年建于艮山白  
石村元至正間燬洪武三年重建二十四年立為叢  
林永樂十二年移建今所

崇福寺在艮山門外宋雍熙間建大中祥符元年改


今額大觀間燬紹興間重建元末燬洪武十六年重建

因果寺在艮山門外晉開運二年錢忠懿王建名崇壽宋大中祥符元年改今額元末燬洪武二年重建寶界寺在艮山門外梁貞明間建于城中名翠峰宋治平間改今額移建今所

定香寺在艮山門外宋乾德四年建于西湖上今定香橋是也名香積院治平二年改今額寶慶間建旌

德觀移建今所

月塘寺在艮山門外何衛店宋淳熙間建在月塘之  
北嘉熙三年潮壞徙今所元至正初潮水復壞徙高  
原尋燬洪武間重建月塘者沙田也土脈宜瓜宋有  
周姓者善種瓜號周家算筍瓜



西湖遊覽志卷十九

# 欽定四庫全書

史部

西湖遊覽志卷

二十一至二十四

詳校官太僕寺少卿<sub>臣</sub>李廷欽

刑部郎中<sub>臣</sub>許兆椿覆勘

總校官編修<sub>臣</sub>王燕緒

校對官中書<sub>臣</sub>葉蘭

謄錄監生<sub>臣</sub>張元任

欽定四庫全書

西湖遊覽志卷二十

北山分脈城內勝蹟

城闔

武林門錢塘門

武林門宋名餘杭門俗稱北關門入門而南有虎林  
山土阜陂陀高可三丈廣不滿百步宋楊至質記云

明 田汝成 撰

者舊言錢氏有國時此山實在郭外叢薄蒙密異虎  
出焉故名虎林吳音承訛轉虎為武耳葉紹翁四朝  
聞見錄乃謂虎林即靈隱山因避唐諱改為武林元  
非有兩山一為虎林一為武林也樓攻媿為太乙宮  
道士賦詩云武林山出武林水靈隱後山毋迺是此  
山亦復用此名細考其來真有以從來有龍必有珠  
此雖培塿千山餘蓋疑此山為靈隱之餘脈是又指  
二山同為武林矣淳祐志斷之以為漢志明載武林



山為武林水所出決非城內之山自漢已名武林亦非避唐諱而為武蓋此坡為城中勝地或者自寓武林之名于此耳門東有水門出大河西河清河之水達于運河又東宋有天宗水門小北門今塞

錢塘門宋時所築按錢塘記云防海大塘在縣南一里郡議曹華信議立此塘以防海水始開時募有能致一斛土者與錢一千來者雲集因不復取皆棄去而塘成故改名錢塘張君房云杭州武林山在錢唐

縣西南靈隱寺在其上寺東有水曰龍源橫過寺前  
即龍溪也冷泉亭在其上西有水曰錢源過橫坑橋  
入錢湖錢湖一名金牛湖一名明聖湖湖有金牛遇  
聖明即見萬松嶺下西城第一門曰錢湖門次北第  
三門曰湧金門即金牛出見之所也第四門曰錢塘  
門舊縣廨在焉蓋自前古居人築塘以備錢湖之水  
故曰錢塘據此則錢塘之名一起於江一起於湖二  
說兩義按史記秦始皇過丹陽至錢唐則秦時已有

之非始于華信明矣自漢已來江潮為患築塘捍之  
今云築塘以備錢湖之水事無稽證考之釋文云唐  
途也錢古錢姓豈秦漢間有姓錢者居江干或築塘  
以捍海遂以起名如富陽孫洲之類是也至于錢塘  
門名第因錢唐舊縣治近此門因得名耳非取義于  
錢湖也

衢巷河橋

入武林門折而東過中正橋又南至觀橋其街之東為

廣豐廣積二倉橋街仁和倉街普寧坊西為同德坊興  
賢坊報恩坊

中正橋俗稱斜橋自此而南至正陽門為宋時御街  
長一萬三千五百尺舊鋪石板衡從三萬五千三百  
有奇咸淳七年安撫潛說友易其闕壞者凡二萬幅  
然後經涂九軌砥平矢直至元時兩岨民居稍稍侵  
切然綽楔無敢跨街建者皇明正德已前猶然至嘉  
靖元年御史何鉞始為鄉貢士建坊于吳山坊北自

是題名楔綽並肩而立矣然杭城多火自綽楔跨街而火益熾以木則易於燎延以石則人憚崩摧莫敢向邇撲救古人旌別宅里之義恐不如是

普寧坊俗稱清遠橋巷其東宋有仁和縣丞廳又東有太社太稷壇紹興十二年築以春秋二仲臘前一日祭其禮視皇祇之制壇之北有靈池雖旱不竭稍北有天宗鹽庫酒庫市舶務過天水院橋有六部架閣淳祐倉草料場天宗庫貯鹽酒以待宗人之頒

給者 六部架閣以貯六部圖籍案牘者蓋漢掌故之遺也紹興三年建 淳祐倉淳祐九年京尹趙與憲建以儲米之糴于帥司者 草料場受畿內所輸稻麥荳以給騏驥院良馬院與三衙諸府之馬

同德坊俗稱燈心巷其西為祥符橋桐樹園新莊橋橋左右宋有貢院別試所大理寺仁和縣仁和學豐儲倉軍器所東太乙宮萬壽觀元真觀晨華館千佛閣安福寺並廢 桐樹園國初有鐵作局 貢院宋

時三州治貢院在錢唐門外王家橋以試本州之士  
漕司貢院在北關門外以待兩浙寓士及有官人宗  
女夫等禮部貢院在新莊橋東以待進士紹興十年  
始定取士之法三年一舉必有手札付考官敦求賢  
之意自淳熙二年帝作聞喜燕詩賜進士詹驥等遂  
為令典踵行並刻石院中 別試所以待貢士之避  
親嫌者其後申監漕選者亦試于此 大理寺舊在  
錢唐門內紹興二十年以其密邇景靈宮號控鞭撻

之聲非所以妥神也乃徙於此寺前有清明池 仁  
和縣吳越時分自錢塘置錢江縣在梅家橋西宋初  
改仁和紹興三年徙建於此高宗初入杭州問縣名  
仁和喜曰此京師門名也蓋太祖次陳橋驛從仁和  
門入以為吉兆故駐蹕之意始定矣 仁和學在縣  
治之東有文行忠信四齋 豐儲倉景定初賈似道  
行公田法以此收其租入 軍器所以造御前器械  
紹興初以內侍提點後改隸工部 東太乙宮紹興



間建以祀五福太乙之神兩廡繪三皇五帝日月星辰嶽瀆九宮貴神每歲四立日祀之四孟車駕亦幸馬虎林山在其後圃萬壽觀紹興間建以大霄殿奉昊天寶慶殿奉聖祖長生殿奉長生帝後殿奉太祖以下諸帝西側純福殿奉元命四孟朝獻畢車駕詣宮行香景定間建宸華館于千佛閣之東命羽流主之觀東有回龍橋元真觀唐中宗景龍二年建遂名景龍後唐改中興觀錢武肅王病目禱而愈改

為錢明宮宋雍熙二年改元真觀大中祥符間改天  
慶觀天禧間王欽若請移天慶于真聖觀復名元真  
千佛閣安福寺今廢為同仁祠

興賢坊以元時貢院得名

報恩坊俗稱觀巷有報恩光孝觀舊名開元宮清泰  
四年錢王建宋景德四年改景德觀崇寧三年改崇  
寧萬壽觀賜田千畝政和三年建徽宗本命殿紹興  
七年改報恩廣孝院尋改光孝以崇奉香火其西宋

有惠民西局御厨小營宋之惠民局有五皆貯藥以待病者

觀橋吳越王建題其梁曰吳越王寶正六年辛卯四月八日因建錢明觀造此石橋吳越國王記觀橋北有普庵院至正年建觀橋之水自東而西過青蓮橋祥符橋折而北合清湖之水

自觀橋而南至衆安橋其街之東為懷遠坊安國坊延定坊西為保和坊純禮坊澄清坊

懷遠坊俗稱軍頭司巷宋時有軍頭司在焉

安國坊與保和坊對俗稱北橋巷宋有文思院吉祥寺並廢 文思院掌金銀犀玉工巧之制綵繪裝鈿之飾輿輦法物尺寸之度規鈇鎔鑄鏤織之法內外所領凡三千餘作 吉祥寺宋乾德三年睦州刺史薛溫捨宅為寺治平二年改廣福南渡初割其兩傍地為文思院軍頭司而寺額改吉祥今為民居蔡端明吉祥寺賞牡丹對月詩花未全開月未圓看花對

月思依然明知花月無情物若使多情更可憐蘇子  
瞻簪牡丹詩人老簪花不自羞花應羞上老人頭醉  
歸扶路人應笑十里珠簾半上鈎又花將落而陳述  
古期不至詩今歲東風巧剪裁含情只待使君來對  
花無語花應恨直恐明年便不開述古期明日至因  
用前韻詩仙衣不用剪刀裁國色初酣卯酒來太守  
問花花有語為君零落為君開又惜花詩吉祥寺中  
錦千堆前年賞花真盛哉道人勸我清明來腰鼓百

面如春雷打徹涼州花自開沙河塘上插花回醉倒  
不覺吳兒咍豈知如今雙鬢摧城西古寺沒蒿萊有  
僧閉門手自栽千枝萬葉巧剪裁就中一叢何所似  
瑪瑙盤盛金縷盃而我食菜方清齋對花不飲花應  
猜夜來雨雹如李梅紅殘綠暗吁可哀跋云錢唐吉  
祥寺花為第一壬子清明賞會最盛金盤綵籃以獻  
坐者五十三人夜歸沙河塘上觀者如山爾後無復  
繼也今年諸家園圃花亦極盛而龍興僧房一叢亦

奇但衰病牢落無以發興耳昨日雨雹如此花之存  
者有幾可惜也又冬至遊吉祥寺詩井底微陽回未  
回蕭蕭寒雨濕枯荻何人更似蘇夫子不是花時肯  
獨來後十日復至詩東君意淺著寒梅千朵深紅未  
暇裁安得道人殷七七不論時節遣花開明年冬十  
月寺中牡丹開數朶述古作詩子瞻和云一朵妖紅  
翠欲流春光回照雪霜羞化工只欲呈新巧不放閒  
花得少休又云當時只道鶴林仙解遣秋花發杜鵑

誰信詩能回造化直教霜桺放春妍

延定坊舊名清寧坊其東為度生橋俗稱鵝鴨橋橋畔宋有春風樓謂之北酒庫

保和坊俗稱磚街巷

純禮坊與延定坊對名後洋街俗稱竹竿巷

澄清坊在衆安橋北堍沿河者

自純禮坊而西其街之南為井字樓北為孩兒巷燈籠巷新營街



井字樓宋酒樓也疊構如井故名其西有白澤廟  
新營街之西元有江淮財賦總管府丞相巴延祠府  
地廢為民居祠地為按察司馬廐矣

自澄清坊而西轉入興慶坊為潘閬巷紀家橋

興慶坊舊名前洋街與結縛橋對

潘閬巷宋初處士潘閬所居也閬字逍遙錢唐人有  
詩名語見才情雅致志中巷內有三官宅

紀家橋在按察司右元時改乘驄橋北察院在焉今

之嘉湖道即其址也其西為西湖書院國初改仁和  
學天順間學徙而其地併北察院皆為按察分司及  
囚舍矣 紀家橋之南為德化坊舊稱木子巷有明  
慶寺千頃廣化院並廢 明慶寺唐大中二年建有  
法喜堂明碧軒南宋駐輦遂勅比東京相國寺祈禱  
雨暘建散聖節咸在焉嘉熙四年七月理宗幸寺祈  
雨回鑾撤蓋甘雨隨注平章喬行簡上詩稱賀上遂

山道場嘉泰三年建御書閣題曰宸奎萬壽之閣有  
蘇子瞻書觀音經碑 王介甫法喜堂詩浮屠之法

與世殊洗滌萬事求空虛寸心以此不掛物一堂收  
身自有餘堂陰置石雙嵒嶠石根立竹青扶疎一來  
已覺心膽豁况乃宴坐窮朝晡初憶幼時勇自許壯  
大看俗尤崎嶇豐車肥馬載豪傑少得志願多憂虞  
始知進退各一理造次未可分賢愚會將築室返耕  
釣相與此處吟江湖又明碧軒詩明碧軒南竹數叢

別來江介幾秋風道人無復人間世嗟我今為白髮  
翁趙忠簡公明慶僧房夜坐詩月明牕竹冷橫斜坐  
看風燈落燼花老眼病餘嫌細字枯腸寒甚怯清茶  
囊空豈是久為客夢短其能飛到家但有流年侵髮  
髮蕭蕭蓬葆颯霜華千頃廣化院開平元年吳越  
王建南渡後為臨安府祝聖道場僧了性善醫學草  
書趙閱道題其堂曰垂慈以著醫績蘇子瞻作草書  
歌以贈之歌云物生有象乃有滋夢幻無根成斯須

方其夢時了非無泡影一失俯仰殊清露未晞雪已  
驅此滅滅盡乃真吾云如死灰實不枯逢場作戲三  
昧俱化身為醫忘其軀草書雖學聊自娛落筆已喚  
周越奴蒼鼠奮髯飲松腴剡藤玉版開雪膚游龍天  
飛萬人呼莫作羞澁羊氏妹

自按察司而南至安福橋折而東至八字橋河南為通  
寶坊河北為豐財坊

豐財坊宋有左藏庫先是韓蘄王有賜第二在新莊

橋者獻于朝為景靈宮在八字橋者獻以為左藏庫  
庫有東西受財賦之入以待邦國之經費東則幣帛  
絕紬之屬西則金銀線券絲纈之屬統于太府寺宋  
時經費多糜于贍兵西蜀湖廣江淮之賦類歸四總  
領所以餉諸屯唯閩浙所輸歸于左藏而大軍取十  
之七宮禁百司之祿裁三之值有浩費則天子出中  
帑封樁以補所闕國初以其地賜蔡指揮今半為官  
署民居矣又西為楊駙馬府即端孝公主第也駙馬

名鎮方建第時命巨璫董宋臣領之大拓四旁其最逼近者為太學生方大猷之居璫意其必雄據未易與語一日具禮往訪之方延入坐璫未敢有請方遽云內轄相訪得非以小屋奉上旨乎璫愕未及對方徐曰內轄以某太學生將梗化耶便當首獻即案書契與之璫以契奏理宗大喜數倍酬之方表謝曰普天之下莫非王土一毫以上悉出君恩蓋上用毛詩下用蘇子表語也理宗又奇之自此擢第登朝旋躋

膺仕矣今其地半為按察分司

入錢唐門而東折而南為白龜池鑷子井黑亭子

白龜池在城下袤廣四畝許池底通西湖李鄴侯所  
鑿其水自來不堪汲飲元仇仁近嘗卜居池上作詩  
云一琴一鶴小生涯陋巷深居幾歲華為愛西湖來  
卜隱却憐東野又移家荒城雨滑難騎馬小市天明  
已賣花阿母抱孫閒指點疎林盡處是棲霞池旁宋  
有都作院



鑷子井在上方寺南水口在湧金門外

黑亭子舊有水溝透城通柳洲寺

門內舊有景靈宮錢唐縣錢唐學上方寺並廢 景

靈宮本宋韓蘄王世忠宅也紹興十三年建以奉祖

宗衣冠之游蓋漢原廟之遺也宋制太廟以奉神主

一歲五饗朔祭而月薦五饗宗室諸王攝事朔祭月

薦則太常寺卿代之景靈宮以奉塑像歲四孟天子

躬祭次日繹祭則后妃六宮從往帝后忌辰則宰相

率百官行香道士作法事天章諸閣以奉繪像時節  
朔望帝后生辰皆徧薦之內臣攝事欽先孝思兩殿  
亦以奉小像上日焚香太廟之祭以俎豆景靈宮以  
牙盤天章諸閣以常饌用家人禮云宮內有崇禋館  
命羽流主之蟠桃亭流盃堂四并堂橘園桂園景靈  
池以湖水灌之水口在昭慶山門左

闕



西湖遊覽志卷二十

欽定四庫全書

西湖遊覽志卷二十一

明 田汝成 撰

北山分脈城內勝蹟

官署

提刑按察司按察分司射圃貢院演武場養濟院

提刑按察司故宋岳武穆王宅也紹興三十一年以  
王宅為太學宋亡學燬元改為肅政廉訪司國初改

浙江提刑按察司設按察使副使僉事洪武十七年  
重建公廨而東近岳王祠西迫北察院基故卑隘門  
外居民叢障成化二年按察使戴珙等盡徙民居開  
道南出抵長生街建坊東曰端本又東睦親街曰弼  
教西曰澄源西過長生橋抵城下白龜池上曰肅政  
內有一清樓梅閣其經歷司照磨所司獄司皆在司  
內 元廉訪副使臧孟祥座右四箴曰淨洗眼睛緊  
縛肚皮硬堅脊梁牢立脚根凡十六字僉事董師謙

為之贊云這眼睛照膽鏡照見誰窮百姓所嗔誰奸  
貪佞看不錯定定定秋月明秋水瑩本無塵洗更淨  
這肚皮長忍飢衆肥甘我糠糜將軍腹寬十圍貪以  
敗脂流臍平生事百甕齏咬菜根事可為這脊梁鐵  
鑄成廣平骨汲孺身曾強項批逆鱗肯折腰揖貴人  
臺中評謂我傾我自我卿自卿這脚根如山立立得  
牢踏得實倖門裏曳不入正路中拔不出持一定禦  
衆誅不退轉堅固力銘贊皆趙孟頫所書刻石尚存

按察分司凡九道曰杭嚴曰金衢曰提學曰水利曰清軍在八字橋河下宋為左藏庫楊駙馬第曰寧紹台曰溫處在總司二門東曰嘉湖曰海道在二門西以副使僉事分理之各舉其職按察使不得統制也故布政司署使字而按察司不署使字者蓋按察者各行其權非若藩省府縣出令止從長官也故分巡之印與堂印分寸相同而因事添設之官又各有欽給關防與印一體官吏臧否皆得舉劾軍民利病皆



得條陳風聞言事實封上達不關白于長官其權與御史等正統後憲綱稍易職掌浸弛彈壓藩服之權全歸御史而布政司叅政叅議又立分守之名叅伍其事為按察者稍掣肘近年朝議乃令按察之長得署僚佐之考益非設官本意矣

校士館舊為三學諸生習射之所嘉靖三十二年督學桐城阮公鶚改建校士於此

貢院宋時在觀橋西新莊橋東元時在祥符橋洪武

初在今府學西即仁和學基也其後人才寢盛又以直隸嘉湖兩府來屬地狹不足以容席舍天順三年徙觀橋之東乃仁和倉舊基也院本宏敞而自嘉靖以來每遇當科之年監臨者遞加營構益以藻彩酷極恢麗有司承奉風旨科擾百端合郡騷動款待儀燕競以豐厚相高名曰作興稍不如意即士謗叢起竊意國初到今徵賢斂才豪傑不應恐不繫于貢院之崇修禮文之優渥也

演武場在錢唐門內宋時景靈宮及錢唐縣治故基  
元時改為教場周廣三百一十六丈先是官軍每歲  
二八月朔日開操五月十一日為止自宣德正統已  
來正軍皆充漕役僅以餘丁操備後復以民壯益之  
養濟院在觀橋西元時貢院基也洪武五年每縣各  
置一所八年合建于此收養民間孤老每口月給米  
三斗柴三十觔冬夏布各一疋小者給三分之二

### 祠廟

忠佑廟顯忠廟同仁祠

忠佑廟在按察司左宋紹興十三年以岳飛故宅改為太學學中時時相驚以岳將軍見孝宗朝詔復其官追謚武穆建廟學左曰忠佑淳祐六年改謚忠武已而學中復驚岳將軍降為土神景定二年從監學之請立為土神封鄂王改謚忠文廟曰忠顯王之父母妻子下逮將佐皆有命秩祠後有銀瓶娘子井銀瓶娘子者王季女也聞王下獄哀憤骨立欲叩闕上

書而邏卒嬰門不能自達遂抱銀瓶投井死王原吉  
詩云碧梧月落烏號霜寒泉幽凝金井床綺疏光流  
大星墜夢驚萬里長城亡女郎報父收囹圄匍匐將  
身贖無所官家聖明如漢主妾心媿死緹縈女井臨  
交衢下通海海枯衢遷井不改銀瓶同沈意有在萬  
歲千春露神采魂今歸來風冷然思陵無樹容啼鵲  
先生墓木西湖邊

顯忠廟在長生老人橋西以奉漢大將軍霍光俗稱

霍使君廟相傳吳王孫皓有疾夢神降于庭自稱霍  
光求立祠于金山之鹹塘以捍水患祠立而疾愈晉  
天福間吳越王立廟于此宋理宗時賜廟額曰顯忠  
元延祐間杭城大火郡人於雲頭見旗幟有霍使君  
三字火頓息香火益盛

同仁祠在祥符橋畔嘉靖十七年御史周汝員等建  
以奉孫公燧王公守仁胡公世寧燧餘姚人正德十  
四年以都御史巡撫江西屬寧庶人反被執不屈而

死亂平贈禮部尚書謚忠烈守仁餘姚人寧庶人反時以都御史提督南贛汀漳軍務起兵討平之封新建伯兼南京兵部尚書世寧仁和人正德十二年為江西按察使疏舉寧庶人不法事下錦衣獄謫戍遼東亂平起都御史歷官太子太保兵部尚書謚端敏

### 道院

開元宮寶極觀天妃宮

開元宮在清湖橋西射圃之北本宋周漢國端孝公

主故第也宮故在泰和坊秘書省之左唐開元中建  
後廢宋以火德王東都有開元陽德觀以奉熒惑寧  
宗既即位詔以嘉邨改開元宮建明離殿以立夏日  
祀之元以秘書省為行中書省至元二十八年大火  
省宮俱燬因兼宮地作省今布政司是也住持董得  
時遂購公主故第為宮公主親理宗女傑構綴飾冠  
于戚里故宮制為道院之魁翰林學士虞集為記至  
治初燬粹德真人王壽衍與其徒張伯雨重建揭曼



碩陳旅為記有堂曰清風曼碩歐陽玄為記一曰介  
春張仲淳為記時壽衍以高行受知於文宗故名彥  
多與之友豐碑偉筆照耀一時今皆仆圯其基半為  
射圃矣虞伯生碑銘云於皇聖世治絲清靜惠宗道  
家受釐有祠內外相望靡不寵嘉煌煌我宮殿于東  
南神明之居在昔前王化家作之中其國都何因何  
稽曰為開元厥維禎符禎符孔明大開元疆神告不  
誣顧民弗省歲行六十既燬而墟除而圖新爰得永

宜天人合謨甲觀夙成帝子攸降巍巍渠渠道貴因  
循不貴改作昔勛我舒迺像貴神赫如有臨風馭電  
車大集于成在今真人克恭璽書恩言雅文真人用  
譙為道光華自朝旋宮率職贊祠恩用不渝錫福予  
齡天子不有于民是敷維千萬年至于億世邈哉永  
圖敢述聖德刻以貞石式章道樞 陳旅碑銘云真  
人大作開元宮斬木邃谷來蔽江命龜置策辰孔臧  
樹屋吉土祠天宗重簷轆轤儀穹隆日月出入戶牖

中大靈何樂家層空老君上邀茲以降仙妹翼輦從  
豐隆翳以赤鳳驤青龍立神執兵門兩旁祝融廬宇  
承中央共驅畢方歸海東曰惟新宮帝所惛璿宮回  
曲蓬渚通珠樹含祥光玲瓏宮成餐帝朝設鐘岳牧  
川后罔不恭真人稽首飛綠章天子萬年民樂康  
揭曼碩碑詩云噫嘻錢唐何王所基由汴革命播都  
南陲定鼎臨安協于神龜元興龍翔大拓疆土四海  
八荒咸覲其主噫嘻錢唐故宮禾黍帝子之居是為

開元以棲百神踰三紀年神弗顧依將事吉蠲回風  
却掃馮怒熒惑宣陰導陽去穢除慝以來清風以專  
靜嘿革故者天鼎新者人矧我真人皇人之真亦曰  
多才能事鬼神身為玄師行仁有勇一倡百和風起  
水涌神宮告新曾不旋踵眴眴樓觀仡仡垣墉儼乎  
天人象帝之宮風馭颺輪於焉從容薦我明馨考我  
鐘鼓於皇萬年受天之祐碑詩揚休石以永固 鄧  
善之題開元宮圖詩云西湖春動風泠泠歛忽鼓瑟

窺湘靈天君要眇降雲輶椒堂桂棟羅芳馨春城日  
逝崦嵫暮幽夢重門鎖花霧玉簫聲沈鳳飛去迸入  
秋風五陵樹至人高懷視雲浮昔者金屋今丹丘白  
鶴來下明月樓知有王喬飛鳥游仙人好幻多戲劇  
海變桑田蓮變碧百靈呵護融風息依舊瓊臺絳宇  
炫耀雲林色 揭曼碩開元宮圖詩香臺遙對紫皇  
家陰洞潛迴七寶車景氣未收春夢斷新宮月冷誦  
南華 馬祖常開元宮圖詩江畔沙痕認夜潮湖邊

山色識前朝卷衣天上吹簫女不怨宮隨野火燒  
黃潛題開元宮圖詩誰使歲舟一夜移紅樓翠幙未  
全非曾聞帝子乘鸞去疑有仙人化鶴歸烟迳月明  
瑤草歇石壇露冷碧桃稀赤欄橋畔多時立閒看楊  
花作雪飛

寶極觀在報恩坊內舊玄元庵元延祐五年道士章  
無為建皇明永樂間道士周思得者仁和人操行雅  
潔精五雷法成祖聞其名召試稱旨建天將廟居之

扈從北征累著功績仁宗建玉虛延恩殿宣宗建彌  
羅寶閣崇玄演法殿改廟額為大德觀英宗建紫極  
殿寵遇優渥景泰初歸老故庵甘茹淡泊其門人以  
法顯者殆百餘人其時有異人號赤脚張亦寓觀中  
與思得友善成化間其徒昌道亨得寵憲宗詔徙玄  
元庵于思得墓左而改其故居為寶極觀

天妃宮在孩兒巷北以祀水神洪武初建神號不見  
經史竊意宇宙間至尊者天有帝象焉地為之配有

后象焉其次水為大有妃象焉故崇其號曰天妃而軍營漕運之所江海河漢之濱悉崇奉之

佛刹

壽聖寺青蓮寺祥符寺興福寺淨住寺法輪寺天長淨心寺聖壽寺菩提寺妙心寺

壽聖寺在虎林山上舊名長壽在東青門外永樂十三年為潮水所侵徙建今所得廢聖壽院故址遂以名焉內有大井合抱銀杏皆宋物也而殘碑斷碣傾



仆草中磨滅不可讀矣俗稱祖山寺

青蓮寺在車橋北宋隆德間錢氏建祥符中改淨戒院先是宋元豐中吳處厚以皇嗣未立上書乞立程嬰公孫杵臼廟詔封嬰為成信侯杵臼為忠智侯廟食于絳後又以韓厥存趙孤三人皆以春秋祠于祚德廟紹興二十年建祚德廟于院內以春秋二仲祭之至正末張氏據聖壽青蓮二寺為府而廟亦廢按春秋于魯成公八年書晉殺趙同趙括于十年書晉

景公卒相去二年而史記乃有屠岸賈欲滅趙氏程  
嬰公孫杵臼共匿趙孤十五年景公復立趙武之說  
以年世考之則自同括死後景公又卒厲公立八年  
而弑悼公立又五年矣其乖妄如是嬰杵臼之事乃  
戰國俠士刺客所為春秋時風俗恐未有此也

祥符寺在祥符橋畔梁大同二年邑人鮑侃捨宅為  
寺舊名發心唐貞觀中改衆善神龍初改中興後改  
龍興宋真宗時改大中祥符其廣九里子院有千佛

閣諸天閣戒壇院院內有鐵塔一石塔四錢王所鑿  
九十九眼井金人南寇燬于兵南渡初斥為軍器所  
元初仍建寺至正末燬洪武間重建其傍地盡為軍  
民之居 蘇子瞻祥符寺上元觀燈詩紗籠擎燭迎  
門入銀葉燒香見客邀金鼎轉丹光吐夜玉珠穿蟻  
鬧連朝波翻焰裏元相激魚舞湯中不畏焦明日酒  
醒空想像清吟常逐夢魂銷曾子固詩月明如晝露  
華濃錦帳明郎笑語同金地夜寒消美酒玉人春困

倚東風紅雲燈火浮滄海碧水樓臺浸遠空白髮蹉  
跎歡意少強顏猶入少年叢

興福寺在斜橋南宋紹興丁卯左丞薛昂以花藥圃  
施僧慧觀築庵名曰擇勝尋建佛刹請龍山廢興福  
院額表之國初定為叢林

淨住寺在觀橋之西北報恩坊內梁武帝時建舊名  
慈光錢氏時改今額紹興間以其地為貢院于是寺  
分為三元末燬洪武初歸併興福

法輪寺在觀橋南五代長興中龜法師建於城東湯  
鎮額曰觀音後改安國宋大中祥符間改法輪洪武  
間立為叢林永樂十八年潮嚙殿基僧至恂改建于  
此

天長淨心寺在後洋巷晉天福四年錢氏建南渡後  
析其地為軍寨咸淳元年興復元季燬景泰間重建  
聶大年送僧曰福聰講還山詩云歸去深居遠俗譁  
莫教巢燕汚袈裟從今悟了三生話高倚瓊臺看雨

花寺內有龍華寶閣宋理宗時捲簾使許禎建宋亡禎挈三子居之學佛自晦名出塵庵元延祐元年有僧講法華經天花紛降遂名龍華其時寶閣穹壯冠絕郡城九曲法濟院宋乾德元年錢氏建于錢唐門外元末移建于此今併天長寺

聖壽寺即永福寺在後洋街宋嘉定元年永明建淳祐間賜額永福以奉秀王香火元至元燬洪武初善祥重建宣德十年賜額聖壽

菩提寺在潘閭巷舊在錢唐門外宋太平興國錢惟  
演捨宅建建炎間燬紹興間重建有南漪迎薰二堂  
元末燬尋以築城徙寺今所永樂間寺僧守公被召  
修大典智淳修戒律別原修藏典約宗亦以高行被  
召四代入覲亦禪門之榮遇也

妙心寺在湧金門內舊在西湖行春橋南元至正間  
徙今所今改使館

西湖遊覽志卷二十一



欽定四庫全書

西湖遊覽志卷二十二

明 田汝成 撰

北山分脈城外勝蹟

衢巷河橋

出武林門而北為崇福橋霍山坊餘杭橋巷新橋巷半  
道紅清湖三閘周公泉枯樹灣夾城巷左家橋米市巷  
漁塘巷碧沼草營巷歸錦橋江漲橋通市橋北新橋

崇福橋在吳山驛前

霍山坊過新河橋路入西山橋下為新河坊口乃張士誠所開者舊有廣惠廟宋康定元年建以祀廣德王張渤者遞代褒封二月八日傾城士女集焉周公謹云余世祀祠山張王動止必禱應如著龜先子需澄江次為有力者攘去先妣時留雪禱于南關之祠山有水邊消息的非遙之語先君霍山所祈亦得此籤越日臨江之命下矣戊辰年鑄子甫五歲病骨蒸

勢殆甚凡藥皆弗効禱籤得蠱之上九云蠱有三頭  
紛紛擾擾如虫在血執一則了退謀之醫試投逐蟲  
之劑凡去蛻蛔三其色如丹即日良愈甲寅春往桐  
川炷香得籤云不堪疾病反東床是歲外舅捐館壬  
午五月二十八日杭城金波橋馮氏火作次日勢亦  
張雖相去幾十里而人情遑遑不自安時楊大方潘  
夢得皆同居相慰巫言神語皆吉因卜去就于神得  
五十六籤云遭人彈効失官資火欲相焚盜欲窺于

是挈家湖濱是夕四鼓成焦土

餘杭橋宋端平二年建東通猪圈壩其時有北郭稅務

新橋巷東通陸家場

半道紅相傳舊時夾路栽桃花故名俗訛為半塘洪清湖上中下三閘洩城中諸河之水自東而北轉達東新橋德勝壩為下塘河

周公泉又名北牖泉在下閘巷

枯樹灣東通德勝橋舊名堰橋宋韓世忠掩擊叛賊  
苗劉于此故郡人稱為德勝橋

夾城巷東通遞運所四達之衢市廛殷阜肩摩踵接  
第夾城名義不知何所取也故老皆言元有總兵楊  
完者與張士誠築壘相拒此其遺基然當錢氏築城  
時云自秦望山由夾城東亘江干洎錢唐湖凡七十  
里則夾城之名唐末五代已有之似非起于楊完者  
也豈以其近傍羅城若杜詩所稱花萼夾城通御氣

之談歟國初有為夾城八景卷者名流題詠甚多今  
掇其著者一曰夾城夜月王洪卜算子詞孤月泛江  
秋露下高城靜期著佳人夜不來坐轉梧桐影吹徹  
紫鸞笙寶篆烟消鼎桂子飄香下廣寒銀漢雙星耿  
聶大年臨江仙詞萬里碧霄雲散盡長天孤月流輝  
城陰寥濶櫺聲稀試登高處望露濕五銖衣不見遼  
東華表鶴人民昔是今非驚鳥三匝正南飛銀河風  
露冷騎得綵鸞歸 二曰陟門春漲王洪詞驚雪噴

高崖雷響青天曉剛道吳胥駕海來勢壓滄溟小兩  
岸走漁舟潑亂飛春鳥誰信神魚去不留五色祥雲  
繞聶大年詞西北關城如鐵甕夜來春漲崩奔驚濤  
拍岸撼崑崙桃花三汲浪何處覓仙源彷彿鴟夷乘  
白馬潮頭日落雲昏瀆祇川后亦銷魂琴高騎赤鯉  
隨水到龍門 三曰半道春紅王洪詞宿雨漲春流  
曉日紅千樹幾度尋芳載酒來自與春風遇弱水與  
桃源有路從教去不見西湖柳萬絲滿地飛風絮聶

大年詞記得武林門外路雨餘芳草蒙茸杏花深巷  
酒旗風紫騮嘶過處隨意數殘紅有約玉人同載酒  
夕陽歸路西東舞衫歌扇繡簾櫳昔遊成一夢試問  
賣花翁 四曰西山晚翠王洪詞斜日照疎簾雨歇  
青山暮白鳥鳴邊一半開杏靄和烟度樓上見平湖  
影隔青林霧吹斷鸞簫興未闌月照芙蓉露聶大年  
詞一抹斜陽低遠樹分明翠斂西山蒼蒼松檜鎖禪  
關疎鐘殘磬裏倦鳥亦知還谷口樵蘇歸路晚六橋



流水潺潺行人指點有無間天風吹散盡露出豹  
文斑 五曰花圃啼鶯聶大年詞芳圃萬花圍繞遍  
軟紅晴點香泥金衣公子柳邊迷為憐春色好終日  
往來啼記得早朝花底散金河草色萋萋數聲只在  
御河西東風回首處香霧滿長堤 六曰皋亭積雪  
聶大年詞昨日孤峰如潑翠今朝玉立巔崦瑤林琪  
樹間琅玕蓬萊塵世隔弱水竟漫漫玉宇峒堯千仞  
表羣仙飛珮驂鸞不知何處倚闌干洞簫吹一曲鶴

篴不勝寒 七曰江橋暮雨聶大年詞一葉漁舟吞  
暮景夜來江漲平橋蕪葭兩岼響蕭蕭水村烟郭外  
隱隱見歸樵鴻鴈欲歸愁翅濕誰憐萬里雲霄空濛  
山色望中遙鐘聲何處寺白鳥沒林腰 八曰白蕩  
烟村聶大年詞北郭秋風禾黍熟牛羊晚下平田一  
村桑柘起寒烟田翁邀社飲擊鼓更燒錢處處雞豚  
泥飲罷瓦盆濁酒如泉往來東陌與西阡誰言淳朴  
俗自有一山川

左家橋北宋有春融樓謂之北外庫

米市巷宋時舊名也其東為寶慶橋舊名黑橋洪武  
初建

漁塘巷自霍山坊而下有上下陡門洩清湖水由  
漁塘巷入西為范婆橋橋下為清水潭潭西為望佛  
橋西南通水磨頭望佛橋西其土神曰左相公廟廟  
後為福昌巷巷西行為白蕩夾城八景所謂白蕩烟  
村者是也又西為古蕩

碧沼在湖墅西左八郎祠前池廣三畝水極清冽俗稱清水潭

歸錦橋俗稱賣魚橋自此而上至左家橋夾城巷皆稱湖墅俗訛為湖州市

江漲橋在歸錦橋北元末開河構木而渡宣德間僧覺澂改建石橋嘉靖間圯今復建

通市橋在江漲橋南宣德間僧覺澂建

北新橋在香積寺北宋紹興間建名中興永安橋元

末圮洪武初重建

出錢唐門而西為東西馬塍羊角埂

東西馬塍在溜水橋北以河分界並河而東抵北關外為東馬塍河之西上泥橋下泥橋至西隱橋為西馬塍錢王時畜馬於此至三萬餘匹號曰海馬故以名塍或曰馬姓二人東西居共為園田之塍非也土細敏樹杭城四時花卉于此出焉今名南花園北去十餘里為板橋今名北花園元羽士張伯雨結廬馬

滕陳旅記之其略曰錢唐邑屋叢轅數十里至為重樓以居委巷若闕市人氣滙鬱為溽霧城西山水清曠而笙歌粉黛上下無空日夫杭東南奧區芬華之所族而幽靜者之所處也城北有村曰馬滕居民多業藝花土沃質聚近而塹遠至元間句曲外史來棲焉為閣四楹佳卉叢植旁有長松數十章落落如高人湖上之山騰伏閣外蓋得冲

闕







淺橘林明日暮水

渾魚網聚東門故侯應自許  
灞陵醉尉寧須怒何須  
學稼隨老農荷鋤驅犢田中去  
張伯雨自詠馬塍

新居詩云浮家泛宅意何如玉室金堂計未疎  
歸錦橋邊停舫子散花灘上作樓居澹然到處自鑿井  
玄晏閉門方著書但得草堂貧便足人間何地不樵漁  
張仲舉題張外史馬塍新居詩云窈窕丹房古澗  
阿長松脩竹繞層坡桃園隱者時相遇茆洞仙人夜

或過沆瀣盃寒供曉食青冥笙響答空歌白雲浮出  
池痕滿知是龍泓宿雨多 薩天錫宿張外史馬塋  
新居詩云竹樹忽聞乾鵲噪明朝歸去候新晴小樓  
無處著秋意暗雨空山如海聲葉落牕虛聞鶴步峰  
回路轉斷人行誰知昨夜玄洲客剪燭談詩到二更  
羊角埂自溜水橋北柴場至乳臺渡口延袤十餘里  
介東西馬塋之間其形彎曲如羊角然

西湖遊覽志卷二十二

欽定四庫全書

西湖遊覽志卷二十三

明 田汝成 撰

北山分脈城外勝蹟

官署

南京戶部分司江漲稅課司吳山驛遞運所德勝壩猪  
圈壩

南京戶部分司在江漲橋北掌權商稅國初差御史

監三閘辦課程或戶部官監收船鈔未有定置景泰元年差戶部主事于蘇杭二府專掌之始建鈔關於此六年罷主事歲委府官收鈔成化四年罷鈔關七年復鈔關弘治六年命于南京戶部差官遂為定例江漲稅課司在霍山坊原在北關駐節基洪武二十五年移建于此

吳山驛在武林門外洪武七年建曰杭州驛九年改吳山驛其西有駐節廳洪武二十五年建

遞運所在夾城原在城內洪河橋洪武七年徙建于此

德勝壩在武林門外東洪武五年建

豬圈壩在武林門外東洪武三年建

### 祠廟

社稷壇郡厲壇

社稷壇在錢唐門外西北宋太乙宮故基也宋時在嘉會門外元時改錢湖門外洪武三年徙建今所

郡厲壇在錢唐門外洪武三年建以祀鬼之無歸者  
以清明日七月十五日十月初一日致祭

道院

石姥廟五界廟印侯廟晏公廟

石姥廟在德勝壩其神石瑰當唐長慶間江濤為患  
神竭家貲築堤捍之竟死于事屢見靈異守臣上之  
咸通中封潮王故俗稱潮王廟

五界廟在歸錦橋西洪武三年建

印侯廟在觀音橋西廟後有印墓

晏公廟在夾城寓崇果寺內周顯德二年吳越王建  
舊名羅漢院宋治平中改額崇果洪武初改奉晏公  
相傳為水神也故軍營漕運之所往往立廟

### 佛刹

香積寺昭化寺妙行寺法雲寺定光寺化度寺廣教寺  
真如寺顯教寺覺圓寺普明寺西隱寺豐樂寺永慶寺  
香積寺在江漲橋北宋太平興國三年柯氏捨宅為

寺舊名興福大中祥符間賜額香積門臨官河帆檣  
往來者日百千計秉燭猶喧一逕蛇行茂林蔭密隱  
然城市異數也

昭化寺在德勝壩周顯德間吳越王建宋大中祥符  
改令額永樂九年燬踰年重建

妙行寺在夾城巷宋徽宗時有僧思淨者姓喻畫佛  
甚妙人稱喻彌陀遂棄家學佛捨宅為寺以接待雲  
水二十年間往來者三百萬衆故俗稱接待寺方臘



之亂思淨詣賊乞以一身代一城之命賊為稍戢元  
季燬宣德二年重建寺南為望佛橋聶大年詩妙行  
禪寺夾城隈穀雨乾時偶獨來一榻白雲松子落滿  
園黃蝶菜花開閒看物態陰晴變老被鐘聲旦暮催  
客有可人期不至步隨斜日下蒼苔

法雲寺在草營巷晉天福五年吳越王建元至正末  
燬永樂丙申重建有愚蒙極和尚塔在寺之右蒙極  
洪武間名僧

定光寺在清湖中閘巷晉天福四年吳越王建元末燬洪武五年重建

化度寺在江漲橋梁天監間朱异捨宅為寺名衆安隋改衆善唐改重雲再改承雲宋治平二年改今額旁有崇善王廟元至元間燬至正間僧若金復建

廣教寺在北新橋東晉天福中吳越王建舊名傾心宋大中祥符間改今額慶元六年密印法師重修元末燬洪武四年僧智海重建

真如寺在江漲橋東宋韓蘄王捨宅為寺構重閣安奉金書大品般若經智度論于其上元至正二年燬洪武十五年重建

顯教寺在武林門外舊為華嚴庵宋紹興三十三年建乾道五年移請今額後徙在城金剛嶺嘉熙間燬寶祐年間徙今所元末燬洪武初重建

覺圓寺在武林門外五里皇慶元年僧慈濟建元末燬洪武十年重建今併昭化寺

普明寺去西湖可四里許在西馬塍宋紹熙元年建  
庵曰普明治鐵為佛嘉定十三年請額得古廢寺普  
明之額偶與庵同遂移賜之改庵為院元末張士誠  
據為敵壘毀佛為軍器院廢正統四年僧宗浩重建  
天順二年請賜舊額角東徐恕記俗猶稱鐵佛寺

西隱寺在西馬塍烏盆橋畔宋乾德元年建舊有福  
壽寺在望佛橋西南俗稱東隱寺烏盆橋一名富春  
橋

豐樂寺在西馬塍宋乾德六年僧雪巖建名歲豐禪院治平間改寶覺豐樂寺

永慶寺在西馬塍清泰二年吳越王建名湧泉院宋治平三年改額泉從石罅流出折入黃山橋河味極清美高宗愛之嘗取以瀹茗

西湖遊覽志卷二十三

欽定四庫全書

西湖遊覽志卷二十四

明 田汝成 撰

浙江勝蹟

浙江

浙江在郡城之東南登西湖諸山則大畧可瞰其源  
發自徽州曲折而東以入于海故名浙江亦曰浙河  
其潮晝夜再上諸家立說不同宋時郡志載姚寬西

溪殘語及徐叔明高麗錄二篇大抵皆云潮隨日而應月依陰而附陽元時裴伯宣作浙江潮候圖說又櫟括其詞更加明爽其說曰大江而東凡水之入于海者無不通潮而浙江之潮獨為天下奇觀地勢然也浙江之口有兩山焉其南曰龕山其北曰赭山並峙于江海之會謂之海門下有沙渾跨江西東三百餘里若伏檻然潮之入于浙江也發乎浩渺之區而頓就斂束逼礙沙渾回薄激射折而趨于兩山之間



拘怒不洩則奮而上躋如素蜺橫空奔雷殷地觀者  
膽掉涉者心悸故為東南之至險非他江之可同也  
原其消長之故者曰天河激涌曰地機翕張揆其晨  
夕之候者曰依陰而附陽曰隨日而應月地志濤經  
言殊旨異胡可得而一哉蓋圓則之運大氣舉之方  
儀之靜大水承之氣有升降地有浮沈而潮汐生焉  
日有盈虛潮有起伏故盈于朔望虛于兩弦息于朏  
朒消于朏魄而大小準焉月為陰精水之所在日為

陽宗陰之所從故晝潮之期日常加子夜潮之候月  
必在午而晷刻定焉卯酉之月陰陽之交故潮大于  
餘月大梁析木河漢之津也朔望之後天地之變故  
潮大于餘日寒暑之大建丑未也一晦一明再潮再  
汐一朔一望再虛再盈天一地二之道也月經于上  
水緯于下進退消長相為生成厯數可推毫釐不爽  
斯天地之至信幽贊于神明而古今不易者也杭之  
為郡枕帶江海遠引甌閩近控吳越商賈之所輻輳

舟航之所駢集則浙江為要津焉而其行止之淹速  
無不畢聽潮汐者或違其大小之信爽其緩急之宜  
則必至于傾墊底滯故不可以不之謹也某承乏茲  
郡屬兵革未弭之秋信使之往來師旅之進退雖期  
會紛紜邊陲警急必告之曰謹候潮汐毋躁進以自  
危然而跡累肩摩晨馳夕騫有不能人喻而戶說之  
者考之郡志得四時潮候圖簡明可信故為之說而  
刻石于浙江亭之壁間使凡行李之過此者皆得而

觀之以毋蹈夫觸險躁進之害亦庶乎思患而預防之之意云按桑欽水經云漸江水出三天子都北過餘杭東入于海酈道元注云浙江一名漸江水出丹陽黥縣南蠻中又東北經建德州又北至新城縣東北至富陽縣又東北過錢唐縣此其說與今水道符合其云東經靈隱山下東合臨平湖又東經禦兒鄉又東經槎瀆注于海其說與今不合蓋槎瀆近皋亭山而海又在其東南相去甚遠非入海處也豈地勢

移易而向之斥鹵漲成平陸耶其潮晝夜再上杭人有為詩括之者曰午未未未申寅卯卯辰辰巳巳巳午午朔望一般輪此晝候也初一日午末初二日未初十六日如初一夜候則六時對衝子午丑未之類此亦其大槩耳其交澤起水大小之度則四時不同春三月初一日十六日午末大夜子正初二日十七日未初大夜子末初三日十八日未正大夜丑初初四日十九日未末大夜丑末初五日二十日申正下

岸夜寅初初六日二十一日寅末漸小晚申末初七日二十二日卯初漸小晚酉初初八日二十三日卯末漸小晚酉正初九日二十四日辰初小晚酉末初十日二十五日辰末交澤晚戌正十一日二十六日巳初起水夜戌末十二日二十七日巳正漸大夜亥初十三日二十八日巳末漸大夜亥正十四日二十九日午初漸大夜亥末十五日三十日午正極大夜子初秋與春同夏初一日十六日午末大夜子正初

二日十七日未初大夜子末初三日十八日未正大  
夜丑初初四日十九日未末大夜丑正初五日二十  
日申初下岸夜丑末初六日二十一日寅初小晚申  
正初七日二十二日寅末小晚申末初八日二十三  
日卯初小晚酉初初九日二十四日卯末小晚酉正  
初十日二十五日辰初交澤晚酉末十一日二十六  
日辰末起水夜戌初十二日二十七日巳初漸大夜  
戌末十三日二十八日巳末漸大夜亥初十四日二

十九日午初漸大夜亥末十五日三十日午末大夜  
子初冬初一日十六日午末大夜子初初二日十七  
日未正大夜子末初三日十八日未末大夜丑初初  
四日十九日申初大夜丑末初五日二十日申正下  
岸夜寅初初六日二十一日寅末漸小晚申末初七  
日二十二日卯初小晚酉初初八日二十三日卯末  
小晚酉正初九日二十四日辰初小晚酉末初十日  
二十五日辰末交澤夜戌初十一日二十六日巳初



起水夜戌末十二日二十七日巳正漸大夜戌末十三日二十八日巳末漸大夜亥初十四日二十九日午初漸大夜亥正十五日三十日午正漸大夜亥末元時吳亨壽答巖起論潮書云至元十八年秋八月十有八日足下觀潮浙江亭有詩明日書以遺予若致疑于逆流之水有可詰者朱子註騷謂潮以月加子午之時一日而再至則亦未嘗無說敢即是試為足下誦所聞焉蓋坎本月之體月本水之精月與

水一而已矣在天為月在地為水天有陰陽太少而月為太陰地有剛柔太少而水為太柔古人以方諸取水于月其氣類固相感也而況夫子午之位乃陰陽之始于其所始而月加焉則陰與陽感而陰以升陰與陰遇而陰以盛水陰類也當其所加之時湧而逆上從其類也月一晝夜凡一加午故潮一日再生月一日退天十三度十九分度之七故潮日遲於一日所以初三之潮晝遲而入十八之夜十八之潮夜

遲而入初三之晝也一月之間生明生魄潮亦再盛  
焉生明之潮則自前月二十六長水謂之起信歷晦  
朔至月三日謂之大信初四潮勢漸殺謂之落信歷  
上弦至月十日謂之小信生魄之潮則自十一始長  
歷望至十八而盛自十九始殺歷下弦二十五而衰  
其起落大小之信亦如之天下之至信者莫如潮生  
落盛衰各有時刻故潮得以信言也月于一月之間  
漸遲而縮一日潮于兩信之內漸遲而縮兩潮秋月

最明秋潮最盛亦其理然也又嘗考之坎為月魄離  
為月魂震生明也兌上弦也乾望卦也巽生魄也艮  
下弦也坤晦卦也生明之盛非無故而盛也坤一索  
而得長男故盛過兌少而往則衰矣生魄之盛亦非  
無故而盛也乾一索而得長女故盛過艮少而往則  
衰矣驗之于月參之于卦潮之理其為庶幾乎或曰  
誠如是則陽之盛莫如乾陰之盛莫如坤潮不于是  
焉大而顧大于震明巽魄何邪曰茲又先天後天之

說也不本諸先天無以見造化之全體不參諸後天  
無以見造化之妙用先天之卦體也乾坤離坎位于  
四正震巽艮兌位于四維而月之周天實配之後天  
之卦用也退乾于西北退坤于西南父母老而不用  
而長男代父長女代母居東南生長之方天地間萬  
物萬事咸于此乎權輿故其為氣也莫盛焉而潮之  
大信實配之月配其體則陽為明陰為魄而乾坤當  
望晦之位乃陰陽之極也潮配其用則長為盛少為

衰而震巽當大信之候乃陰陽之長也夫如是則其  
不乾坤而震巽也有由矣或又曰亦何以知其必取  
于卦耶曰以納甲家起之納甲者如生明之月昏出  
于庚震則納庚生魄之月晨見于辛巽則納辛之類  
是也陰陽者流用之率驗則月與卦相為用也審矣  
潮而有取于月也不亦有取于卦乎哉或又曰月之  
說然邪則潮之為候亦宜月半以前由微漸大月半  
以後由大漸微以象夫三五而盈三五而虧可也今

乃于明魄之生兩盛焉何哉曰明魄之盛固已如前  
所云然月一月一周天而一日之內則一加子一加  
午者也潮于月加子午之時一日再至故亦于月生  
明魄之日一月而再盛焉月之一潮之再若不相似  
而實相感名非深于理者未易以語此或又曰子所  
論浙江潮也他江亦有潮其遲速不同何與曰潮之  
生必生于月出之海浙江之去海為近故其至也如  
時他江所去有遠近故所至有遲速耳或又曰古今

言潮者必推浙江亦謂銀山雪屋有頭數丈此為異  
爾他江之潮第如湧水復與此不同何與曰浙江去  
潮生處近掀天沃日之勢方盛而不可遏赭山龕山  
橫鎖江口頓然斂寬就窄其勢必至于衝激奔射也  
他江去潮生處遠遠則必殺故但湧水而已又何疑  
焉 白樂天看潮詩早潮纔落晚潮來一月周流六  
十回不獨光陰朝復暮杭州老去被潮催 楊巨源  
送章孝標歸杭詩曾過靈隱江邊寺獨宿東樓看海



門潮色銀河鋪碧落日光金柱出紅盆 羅隱江潮  
詩怒聲洶洶勢悠悠羅剎江邊地欲浮謾道往來存  
大信也知翻覆向平流任拋巨浸疑無地猛過西陵  
只有頭至竟朝昏誰主宰好騎赤鯉問陽侯 蘇子  
瞻中秋看潮五絕定知玉兔十分圓已作霜風九月  
寒寄語重門休上鑰夜潮留向月中看萬人鼓譟懾  
吳儂猶似浮江老阿童欲識潮頭高幾許越山渾在  
浪花中江邊身世兩悠悠久與滄波共白頭造物亦

知人易老故教江水向西流吳兒生長狎濤淵冒利  
輕生不自憐東海若知明主意應教斥鹵變桑田江  
神河伯兩醯雞海若東來氣吐霓安得夫差水犀手  
三千强弩射潮低 觀潮南歌子詞二首海上乘槎  
侶仙人萼綠華飛昇元不用丹砂住在潮頭來處渺  
天涯雷輶夫差國雲翻海若家坐中安得弄琴牙寫  
取餘聲歸向水仙誇 苒苒中秋過蕭蕭兩鬢華寓  
身化世一塵沙笑看潮來潮去了生涯方士三山路

漁人一葉家早知身世兩聲牙好伴騎鯨公子賦雄  
誇 又瑞鷓鴣詞碧山影裏小紅旗儂是江南踏浪  
兒拍手欲嘲山簡醉齊聲爭唱浪婆詞西興渡口帆  
初落漁浦山頭日未歛儂欲送潮歌底曲樽前還唱  
使君詩 又江神子詞鳳凰山下雨初晴水風清晚  
霞明一朶芙蓉開過尚盈盈何處飛來雙白鷺如有  
意慕娉婷忽聞江上弄哀箏苦含情遣誰聽烟斂雲  
收依約是湘靈欲待曲終尋問取人不見數峰青

齊祖之觀潮詩何意涵天苦作威狂驅海若走馮夷  
因看平地波翻起知是滄浪鼎沸時初似長平萬瓦  
震忽如圓嶠六鼇移直應待得澄如練會有安流往  
濟時 仇仁近詩一痕初見海門生頃刻長驅作怒  
聲萬馬突圍天鼓碎六鼇翻背雪山傾遠朝魏闕心  
猶在直上巖灘勢始平寄語吳兒休踏浪天吳罔象  
正縱橫 張光弼次貝廷琚韻詩世代消沈是此聲  
幾回東下復西傾翻騰日月迷朝夕簸蕩魚龍定死

生銜石每憐精衛小投膠未見濁河清眼前波浪猶  
如此莫向蓬山頂上行 錢思復八月十五日同友  
人登樓看潮分韻得如字詩白馬濤頭駕素車至今  
猶自詫靈胥千年元氣淋漓後八月長風震盪初顧  
兔盈虛端不爽神龍變化竟何如須臾落日江明練  
東逝滔滔泄尾閭

瀕江之人好踏浪翻波名曰弄潮宋治平中郡守蔡  
襄作戒弄潮文斗牛之分吳越之中惟江濤之最雄

乘秋風而益怒乃其俗習于此觀游厥有善汭之徒  
競作弄潮之戲以父母所生之遺體投魚龍不測之  
深淵自為矜夸時或沈溺精魄永淪于泉下妻孥望  
哭于水濱生也有涯蓋終于天命死而不弔重棄于  
人倫推予不忍之心伸爾無窮之戒所有今年觀潮  
並依常例其軍人百姓輒敢弄潮必行科罰

觀潮之戲惟宋時獨盛其詳已載偏安佚豫志中當  
時有繪為圖者楊廉夫題之詩云八月十八睡龍死

海龜夜食羅刹水須臾海擘龕赭門地捲銀龍薄于  
紙艮山移來天子宫宮前一箭隨西風劫灰欲洗蛇  
鬼穴婆留折鐵猶爭雄望海樓頭誇景好斷鼇已走  
金銀島天吳一夜海水移馬蹠沙田食沙草厓山樓  
船歸不歸七歲呱呱啼軹道 張憲題詩云磁州夜  
走泥馬駒卧牛城中生綠蕪炎精炯炯照吳會大築  
錢唐作汴都玉殿珠樓連翠閣七寶簾櫳敞雲幙坐  
移艮嶽過江南不數東京舊歡樂茂樹盤盤迷綠雲

龍飛鳳舞峰巒奔玉床下壓大江小海水正入東華  
門木犀花開秋可數統統靈鼉震天鼓海門一線截  
江來雪壁銀城盡飛舞吳商楚估千萬艘黃龍戰船  
頭尾高豈無海道走中土長驅逐北除腥臊烟霧蒼  
蒼遶城郭屋瓦魚鱗互參錯百萬驕民事醉醺坐使  
中原厭羊酪因循六帝不復讐西風八月凭江樓攢  
宮久飲白骨恨洪波不洗青衣羞邦基削盡師臣逐  
軹道人稀子嬰哭繡胸文脛踏浪兒反首誰能報君



辱廟子沙頭卓大旗天吳縮頸不敢馳行人指塔話  
楊璉三十六宮秋草肥

捍江塘築自吳越王蓋江潮為患自唐已然白樂天  
刺郡時嘗禱於神云滔滔大江南國之紀安波則為  
利降流則為害故我上帝命神司之今屬潮濤大湧  
奔激西北水無知也如有憑焉浸淫郊鄆壞敗廬舍  
人墜塾溺顛天無辜居易祇奉璽書興利除害守土  
守水職與神同是用備物致誠躬事虔禱庶俾水反

歸壑谷遷為陵土不騫摧人無蕩析然未聞有修築之績也梁開平四年八月錢武肅王始築塘在候潮門通江門外潮水晝夜衝激版築不就命强弩數百以射又致禱于胥山祠仍為詩一章其末句曰為報龍王及水府錢江借取築錢城函鑰置海門山既而潮水避錢唐東擊西陵遂造竹絡積巨石植以大木隄既成久之乃為城邑聚落凡今之平陸皆昔時江也潮水衝突不常隄岨屢壞大中祥符五年郡守戚

綸與兩浙轉運使陳堯佐申請遣使自京師部埽匠  
壕寨赴州易柱石之制雖免水患而衆頗非其變法  
七年詔江淮發運使李溥同內供奉官盧守勲復依  
錢氏制專其事時水方大溢九年郡守馬亮禱于子  
胥祠下明日潮為之却又漲橫沙數里隄遂以成景  
祐中隄復壞兩浙轉運使張夏作隄十二里置捍江  
兵士五指揮採石修塘隨損隨治杭人德之作廟隄  
上今昭貺廟是也慶厯初六月大風驅潮堤再壞郡

守楊偁轉運使田瑜協力築堤二千二百丈丁寶臣  
作記紹興十年以轉運副使張匯之請招填捍江軍  
額二十二年吏部尚書林文蔚建言乞選諳曉之士  
專置一司詢故老究利病脈絡而後興工且言羅刹  
江濱舊有吳王英烈王廟燼于回祿乞靈無地乞付  
有司營葺從之自是百餘年間屢修屢壞嘉熙戊戌  
秋潮由海門擣月塘頭日朘月削民廬僧舍坍者四  
十里己亥六月詔趙與懽除端明殿學士知臨安任

責修築與懽奏先于傍近築土塘為救急之術然後  
于內築石塘又奏近觀潮勢忽睹異物非龍非魚什  
什伍伍鼓鬣揚鬐欲望奏告上帝或施強弩火炮以  
絕其妖又奏日役殿步司官兵五千五百餘人并募  
夫工及修江司軍兵三千餘人貼立石倉夾植椿笆  
版木晝夜運土填築自水陸寺之下江家橋之上近  
江港口築壩南北長一百五十丈自團圍頭石塘近  
江築擦水塘長六百丈自六和塔以東一帶石堤添

新補廢四百餘丈越三月畢工水復其故皇明成化  
八年八月九月江潮大溢塘壞特甚勅差工部侍郎  
李顥整築始復其舊

月輪山六和塔開化寺

月輪山在龍山南形圓如月其高聳者為月輪峰宋  
時張君房為錢唐令夜宿月輪山寺僧報曰桂子下  
塔遽起望之紛如烟霧回旋成穗散墜如牽牛子黃  
白相間咀之無味

六和塔在月輪峰傍宋開寶三年智覺禪師建先是  
梁開平五年錢王於仁王廢院掘地得大錢以為瑞  
應因建大錢寺設寶幢二座于寺門入宋寺廢禪師  
乃即錢氏南果園建塔以鎮江潮高九級五十餘丈  
撐空兀突跨陸俯川海船夜泛者以塔燈為指南焉  
宣和中燬于方臘之亂紹興二十二年僧智曇募緣  
重建七級而止塔中有湯思退等景寫佛說二十四  
章李伯時石刻觀音像嘉靖三年燬塔下為龍山渡

魚山渡隔岬剡中諸山厯厯可數塔之北為毛湫峪  
宋紹興間塔成曹勛記略云浙江介于吳越一晝一  
夜濤頭自海而上者再疾擊而遠馳虎駭而龍怒猛  
如山立歛如電轉掠隄突岬摧陷田廬為臨安患久  
矣冥冥中若有神物典司其事錢氏有吳越時曾以  
萬弩射潮頭終不能卻其勢後有僧智覺禪師延壽  
同僧統贊寧創建斯塔用以為鎮自是潮習故道居  
民德之宣和三年塔寺俱燬赤地無遺而潮復為患



紹興壬申天子憂之思所以制其害者在廷之臣首  
以復興斯塔為請詔賜可下有司計度庀工治材守  
臣擇可主持斯事者得僧智曇諭以詔旨曇口諾心  
然願以身任不煩官府乃勤渠化募而和義郡王楊  
存中居士董仲永首倡捐貲于是蓮社樂施雲臻霧  
集雖遠在他路亦荷擔而來自癸酉仲春鳩工至癸  
未之春五層告成是年歲晚則七級就緒巍然揭立  
光動山海環壁刻金剛經及塑五十三善知識備盡

莊嚴凡所以鎮靜山川護持法界調伏魔境者莫不  
闕而存焉塔興之初土石未及百簣而潮勢已殺既  
成之後化為安流而瀕江之民恬不驚悸此則塔之  
為功而智曇之植福也 白廷玉同陳大博諸公同  
登六和塔詩云龍山古化城浮屠峙其巔開殿生妙  
香金碧森貝筵應真儼若生倒飛青金蓮頭陀紺林  
叢導我丹梯緣初猶藉佛日閱境儵已玄回頭失誰  
何叫嘯衣相牽且復忍須臾當見快意天嬌兒詫先

登網戶相鈎連炯若蟻在珠九曲隨盤旋爛爛滄海  
開落落雲氣懸羣峰可俯拾背閱黃鶴騫竒觀興懦  
夫便欲凌飛仙絕頂按坤維始見南紀偏神京渺何  
許王氣須停驢舟車禁百蠻島嶼通人烟一為帝王  
州氣壓三大千剛風灑毛髮鐸語空蟬聯紅紅杏花  
園媿乏慈恩篇 張仲舉登塔詩云江上浮屠快一  
登望中烟火是西興日生滄海潢流外人立青冥最  
上層潮落遠沙羣下鴈樹欹高壁獨巢鷹百年等是

豪華盡怕聽興亡懶問僧

開化寺即塔院也宋隆興二年建嘉靖十二年與塔  
俱火傍有金魚池噴月泉持正泉秀江亭鐵井欄刻  
八卦以鎮水怪僧仲殊登秀江亭南柯子詞云金甃  
蟠龍尾蓮開舞鳳頭涼生宮殿不因秋門外莫尋塵  
世捲地江流霽色澄千里潮聲帶兩州月華清汎浪  
花浮今夜蓬萊歸夢十二瓊樓塔傍舊有真聖觀  
寶慶二年建有真武像理宗御贊歐陽永叔小草秋

聲賦歸鴈亭詩石刻今廢

秦望山羅剎石

秦望山去城南一十二里高一百六十丈相傳秦始皇東游江滸欲度會稽登山而望故名秦望後唐同光中錢氏于秦望山建上清宮有巨石二十餘株自然成行名曰金洞門

羅剎石在山之東南橫截江濤海舶經此多為風浪擊覆唐時郡守每歲中秋既望迎潮設祭則樂工歌

舞其上李建勲詩云何年遺禹鑿半里大江中白居易  
易詩簸空石面名羅刹壓捺潮頭敵子胥後改名鎮  
江石五代開平中為潮沙漲沒

五雲山真際院尚書胡公墓

五雲山去城南二十里高數百丈周十五里五峰森  
列駕軼雲霞盤曲而上凡七十二灣俯視南北兩峰  
若雙錐朋立長江帶繞西湖鑑開帆檣擾擾烟霧間  
若鷗鳬出沒上有天井大旱不枯宋時每歲臘前寺

僧必捧雪表進黎明入城中霰猶未集蓋其地特高  
寒云 錢思復登五雲山詩普覺遺衣久不傳五雲  
故色尚蒼然斷崖蘿薛三千丈喬木風霜四百年龍  
井雨深泉獨響漁村潮上月初圓寶坊金碧紅塵聚  
何似茲山更絕緣

真際院梁時普覺禪師結庵天福中賜額真際九月  
遊人最盛

尚書胡公墓在排山塢公名世寧字永清仁和人仕

至太子太保兵部尚書薨嘉靖十年勅葬于此

定山風水洞浮山

定山高七十五丈周七里一百步突出江中風濤至此輒抑聲過此則雷吼霆擊矣其西兩峰壁立名曰龍門上有龍潭能興雲雨宋時春秋習水戰于此有將壇存焉下有浮嶼潭深聚魚對岬為漁浦謝靈運詩所謂宵濟漁浦潭者是也 沈約早發定山詩夙齡愛遠壑晚莅見奇山標峰綵虹外置嶺白雲間傾



壁忽斜豎絕頂復孤圓歸海流漫漫出浦水濺濺野  
棠開未落山櫻發欲燃忘歸屬蘭杜懷祿寄芳荃眷  
言採三秀徘徊望九仙 錢思復定山十咏定山曉  
行云前峰月吐五更初空翠沾衣積雨餘溪火夜明  
經略約澗雲秋重負蘧篨籬林虎與人爭鬪茅屋雞  
催客赴虛不似關山行役者勞勞服賈遠牽車朱梁  
夜泊云長虹下飲逆流渾雪色沙寒石鬪喧晚飯鐘  
催隣驛寺宵漁燈映並山村月明欲解江靈語風橫

難招賈客魂。忽憶楓橋曾繫纜。一篷烟雨夢吳門。六  
和觀月云招提。高占月輪峰。樓閣清虛十二重。秋憶  
天香飄古桂。冷疑巖雪落長空。池光照夜明。金鯽塔  
影橫江卧玉龍。聞道廣寒從此往。竹房開處約飛筇。  
五雲賞雪云獻瑞。名山自昔聞。化人臺殿雜金銀。樹  
靈尚吐三花秀。雲凝全消五色文。鳥絕空江知棹泊。  
鹿迷深徑待樵分。興來更上高寒處。此境應無蕭使  
君。龍門曉雨云神剝峭壁聳雙扉。雨挾腥風下翠微。

黑入太陰迷爽氣白翻叢薄散朝霏  
螺橫雜樹應巖景蛟吐癡雲未霽威  
回首他山新似沐登樓時攬女蘿衣  
漁浦春潮云江漲夜來高幾尋輕濤  
拍岸失蹄涔遲明帆發星灘遠盡日  
舟橫雨渡深杜若風回潁鯉上桃花  
浪起白鷗沈楚人艇子來何許欸乃  
時聞空外音風水二洞云空穴風來自  
吸噓垂巖出水亦渠渠天門此際通  
閭闔海眼何年泄尾閭隱者難招應  
化鶴飛仙可挾更乘魚留題太守懷  
蘇白好事令

無五馬車鳳凰雙髻云鳳來天目憩東南瓊樹巢空  
百鳥慙千仞翱翔秋綰髻兩髦髮鬢暮栖嵐誰嘲風  
落烏紗帽自借山為碧玉簪仙女洗頭休望嶽相期  
岼憤對虛談浮嶼藏魚云潭色空澄島影孤潛鱗時  
出迓天吳浪吞泗磬秋浮玉月照驪龍夜吐珠萬騎  
西來疑滌滌扁舟東去想陶朱沒淵每笑窮漁者何  
處烟波覓釣徒浙江耀武云年年江上習舟師故事  
相傳劫火池春日樓船觀晉將秋風弓弩學吳兒素

車白馬迎旗隼紫鳳玄夷畏虎貔日暮元戎歸細柳  
散花洲畔凱歌時

風水洞在楊村慈巖院側舊名思德洞上洞立夏清  
風自生立秋則止下洞流水潺潺大旱不涸洞中石  
子紅點如丹持出即隱置于內如故 白樂天詩云

雲水埋藏思德洞簪裾束縛使君身暫來不宿歸州  
去應被山呼作俗人 蘇子瞻往富陽新城李節推  
先行三日留風水洞見待詩云春山礫礫鳴春禽此

間不可無我吟路長漫漫傍江浦此間不可無君語  
金鯽池邊不見君追君直過定山村路人皆言君未  
遠騎馬少年清且婉風巖水穴舊聞名只隔山溪夜  
不行溪橋曉溜浮梅萼知君繫馬巖花落出行三日  
尚逶遲妻孥怪罵歸何時世上小兒誇疾走如君相  
待令安有

浮山在城南四十里蘇子瞻守杭日乞開石門河狀  
云按史記秦始皇帝三十六年東游至錢唐臨浙江

水波惡乃西百二十里從狹中渡始皇帝以天下之力徇其意之所欲出赭山橋海無難而獨畏浙江水波惡不敢徑渡以此知錢唐江天下之嶮無出其右者臣昔通守此邦今又忝郡寄二十年間親見覆溺無數自溫台明越往來者皆由西興徑渡不涉浮山之嶮時有覆舟然尚稀少自衢睦處婺宣歙饒信及福建路八州往來者皆出入龍山沿沂皆江江水灘淺必乘潮而行潮自海門東來勢若雷霆而浮山峙

于江中與漁浦諸山相望犬牙錯入以亂潮水洄洑  
激射其怒自倍沙磧轉移狀如鬼神往往于淵潭中  
湧出陵阜十數里旦夕之間又復失去雖舟師泗人  
不能前知其深淺以故公私坐視覆溺無如之何臣  
相視地形訪問父老自浙江上流地名石門並山而  
東鑿為運河引浙江及谿谷諸水凡二十二里有奇  
以達于江又並江為岨度潮水所向則用石所不向  
則用竹木凡八里有奇以達于龍山之大慈浦自太



慈浦北折抵小嶺下鑿嶺六十五丈以達于嶺東之  
古河因古河稍加浚治東南行四里有奇以達于今  
龍山之運河以避浮山之險則浙民幸甚觀此則浮  
山之險自古為然蓋潮入海門分為兩派東派沿捍  
江塘向富春西派直射浮山怒激而回諺稱回頭浪  
者是也

西湖遊覽志卷二十四